



Inatsisartunut ilaasortaq Jens-Frederik Nielsen, Demokraatit

**Akileraarutit akitsuutillu arlallit allanngortinnerisa kingunissai pillugit § 37
nappertorlugu apeqqummut nr. 038-2021-mut akissut.**

Brevdato: 26-05-2021
Sags nr. 2021 - 9895

Akileraarutit akitsuutillu assinngitsut allanngortinneqarsinnaanerisa kingunissai pillugit Inatsisartut suleriaasiat naapertorlugu Naalakkersuisunut arlalinnik apeqquteqarputit. Apeqqutitit Naalakkersuisoqarfinnit akineqartussanngortinneqarput.

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

**1. Ingerlatseqatigiiffiit akileraarutaat 20 procentinngorlugu
appartinneqassagualarpat, pisortanut aningaasatigut
allaffissornikkullu qanoq kinguneqassava?**

Akissut:

Suliffeqarfiit akileraarutaannik 20 %-imut appaaneq, tamakkiisumik atuutilersinneqarpat, pisortat isertitaasa ukiumut 60 mio. kr.-nik toqqaannartumik ikilinerannik kinguneqassaaq.

Pisortanut allaffissornikkut kinguneqassanngilaq.

Suliffeqarfiit akileraarutaannik taamatut appaanerup saniatigut sunniutissaanik naatsorsuivinnissamut tunngaviusinnaasunik kisitsisinik pigisaqartoqanngilaq. Taamatut saniatigut sunniutissaasa pisortat isertitaasa qulaani taaneqartutut ikilisissavaat.

**2. Kaffit eqqussorneqarnerannut akileraarut
peerneqassagualarpat, pisortanut aningaasatigut
allaffissornikkullu qanoq kinguneqassava?**

Akissut:

Kaffit eqqussorneranni akitsuutinit isertinneqartut tamarmiusut 2020-mi 1.989.258,52 kr.-upput.

Pisortanut allaffissornikkut kinguneqassanngilaq.

3. Tiit eqqussorneqarnerannut akileraarut peerneqassagaluarpat, pisortanut aningaasatigut allaffissornikkullu qanoq kinguneqassava?

Akissut:

Tiit eqqussorneqarnerannit akitsuutit tamarmiusut 2020-mi 94.768,89 kr.-nik isertitsissutaapput.

Pisortanut allaffissornikkut kinguneqassanngilaq.

4. Neqit eqqussorneqarnerannut akileraarut peerneqassagaluarpat, pisortanut aningaasatigut allaffissornikkullu qanoq kinguneqassava?

Akissut:

Neqit eqqussorneqarnerannit akitsuutit tamarmiusut 2020-mi 18.541.000 kr.-nik annertussuseqarput.

Pisortanut allaffissornikkut kinguneqassanngilaq.

5. Imigassat eqqussorneqarnerannut akileraarut akitsuinermi 19. november 2019-imi pinnginnerani inissisimaneranut utertinneqassagaluarpat, pisortanut aningaasatigut allaffissornikkullu qanoq kinguneqassava?

Akissut:

Eqqussorneqartut tamarmiusut allanngunngippata imigassat eqqussorneqarnerannut akitsuutit 19. november 2019 sioqqullugu atuuttunut appartinneqarnerat pisortat isertitaanni tamarmiusuni ukiumut 19,7 mio. kr.-nik annaasaqarnermik kinguneqassaaq.

Tamassuma saniatigut oqaatigineqassaaq, imigassat aalakoornartullit eqqussorneqarneranni akitsuutit appartinneqarneranni isumaginninnermi peqqinnissaqarfimmilu aningaasartuutit annertunerulissasut.

Aamma oqaatigineqassaaq, 19. november 2019-imi akitsuutinik qaffaanermi imigassat eqqussorneqarneranni akitsuutit allanngortinnerisa kingorna akit nalinginnaasumik ineriartornerisa affaannaat matussuseraat.

Pisortanut allaffissornikkut toqqaannartumik kinguneqassanngilaq.

6. Tupat eqqussorneqarnerannut akileraarut akitsuinermi 19. november 2019-imi pinnginnerani inissisimaneranut utertinneqassagaluarpat, pisortanut aningaasatigut allaffissornikkullu qanoq kinguneqassava?

Akissut:

Eqqussorneqartut tamarmiusut allanngunngippata tupat eqqussornerannut akitsuutit 19. november 2019 sioqqullugu atuuttunut appartinneqarnerat pisortat isertitaanni tamarmiusuni ukiumut 16,6 mio. kr.-nik annaasaqarnermik kinguneqassaaq.

Tamassuma saniatigut oqaatigineqassaaq, tupat eqqussorneranni akitsuutit appartinneqarneranni peqqinnissaqarfimmi aningaasartuutit annertunerulissasut.

Pisortanut allaffissornikkut toqqaannartumik kinguneqassanngilaq.

7. Sukkut, sukkulaatit mamakujuillu eqqussorneqarnerannut akileraarut akitsuinermi 19. november 2019- imi pinnginnerani inissisimaneranut utertinneqassagaluarpat, pisortanut aningaasatigut allaffissornikkullu qanoq kinguneqassava?

Akissut:

Eqqussorneqartut tamarmiusut allanngunngippata sukkut, sukkulaatit mamakujuillu eqqussornerannut akitsuutit 19. november 2019 sioqqullugu atuuttunut appartinneqarnerat pisortat isertitaannut tamarmiusuni ukiumut 9,7 mio. kr.-nik annaasaqarnermik kinguneqassaaq.

Tamassuma saniatigut oqaatigineqassaaq, sukkut, sukkulaatit mamakujuillu eqqussorneranni akitsuutit appartinneqarneranni peqqinnissaqarfimmi aningaasartuutit annertunerulissasut.

Pisortanut allaffissornikkut toqqaannartumik kinguneqassanngilaq.

8. Isertitanik akileraarut procentpointikkaartumik appartinneqassappat Nunatta karsianut isertitassaraluit qanoq amerlatigisut annaaneqassappat?

Akissut:

Nuna tamakkerlugu akileraarutit procentpointimik ataatsimik appartinneranni Nunatta Karsiata annaasai tamarmiusut qanoq annertutigissanersut eqqortumik oqaatigineqarsinnaanngilaq. Tamanut sunniutigisinnaasai nalorninartorujussuit eqqaassanngikkaanni isertitanit annaasat 112 mio. kr.-nik annertussuseqassapput.

9. Sulinermut ilanngaas ukiumut 1.000 koruuninik qaffanneqassagaluarpat, Nunatta karsiata isertitassat qanoq amerlatigisut annaassavai? Ukiumut 2.000 koruuninik? Ukiumut 3.000 koruuninik?

Akissut:

Sulinermut ilanngaas innuttaasunut ataasiakkaanut tapiissutitut maannakkut akilerneqartarpoq. Sulinermut ilanngaasip 1.000 kr.-nik allanngortinneranni Nunatta Karsiata aningaasartuutai 5. mio. kr.-t missaanni qaffassapput.

Ilanngaasit 2.000 kr.-nik qaffanneranni aningaasartuutit qaffaataat 10 mio. kr.-t missaaniissapput 3.000 kr.-nillu qaffaanermi 15 mio. kr.-t missaaniissallutik.

Qulaani naatsorsuinerni saniatigut sunniutigisinnaasai sillimaffigineqanngillat. Taamaalilluni ilanngaatinut tunngatillugu innuttaasut taamatut naatsorsuisinnaanermut qanoq iliuseqarnissaannik ilisimasat annikippallaarput.

10. Inummut ilanngaas 2021-imi qanoq annertutigissava akitigut iluarsisut 2005-imiit ingerlanneqarsimagaluarpat? - a. Akitigut iluarsisut 2022-imi atuutilersinneqaraluarpat, Nunatta karsia isertitatigut qanoq annertutigisumik annaasaqassava? - b. Inummut ilanngaasip akitigut iluarsisuteqartuarnissaanik Naalakkersuisut pilersaaruteqarpat?

Akissut:

Inummut ilanngaat akit ineriartornerat peqatigalugu ingerlaavartumik aaqqinneqartarsimagaluarpata 2022 eqqarsaatigalugu 66.000 kr.-nik annertussuseqarsimassagaluarpoq.

Inummut ilanngaatip 66.000 kr.-nut naleqqussarnerani isertitanit akileraarutit tamarmiusut ukiumut 342 mio. kr.-nik ikilissapput, taakkunanga 80 mio. kr.-t Nunatta Karsianut tunngassapput sinnerilu 262 mio. kr.-t kommunitut tunngassallutik.

Naalakkersuisut ukiunut aggersunut aningaasanut inatsisissatut siunnersuutip saqqummiunneranut atatillugu aningaasanut politikkertik periuseq nalinginnaasoq naapertorlugu saqqummiuttarpaat. Taamaammat inummut ilanngaammik akit najoqqutaralugit ingerlaannaq aaqqiisarnissamik Naalakkersuisut pilersaaruteqarnersut § 37 naapertorlugu apeqqutitut sinaakkutit iluanni akineqarsinnaangilaq. Ilisimatitsissutigineqarsinnaavorli tamanna akileraarutinik aaqqissuusseqqinnermik suliaqarnissami ilanngunneqarsinnaassasut isumaliuutigineqarsinnaammat.

11. Inuiaqatigiinnut aningaasatigut iluanaarut qanoq annertutigissava, innuttaasoq imminut pilersortuunnginnermit suliffeqalerpat?

Akissut:

Kalaallit Nunaanni Aningaasaqarnermut Siunnersuisoqatigiit piffissani assigiinngitsuni apeqqut tamanna paasinarsarnikuuat. Tamassumunnga erseqqissumik akissutissaqanngilaq, tassa ikiorsiissutit innuttaasut suliffeqanngitsut pisartaqarnerani pineqartup inuttut atukkatigut inissisimanagera apeqquataassammat, aamma pineqartup suliffeqalernermini akileraarutinut isertitanut tamarmiusunut tapersiissutigisinnaasaanut isertitat annertussusiat nutaaq apeqquataassaaq.

Pissutsit assigiinngitsorujussuit tunngavigalugit oqaatigalugu pisortat aningaasartuutini sipaarutaat innuttaasullu isertitaat tunngavigalugit pisortat isertitaasa annertuseriarnerat nalinginnaasumik 130.000 kr.-t aamma 180.000 kr.-t akornanniissapput.

12. Aningaasanut inatsimmi ingerlatsinermut- tapiissutinullu akuersissutaasimasut 1 procentii sipaaraanni, pisortanut aningaasatigut allaffissornikkullu qanoq kinguneqassava?

Akissut:

Aningaasanut inatsimmi ingerlatsinermut tapiissutinullu aningaasaliissutini ataatsimut isigalugu ukiumut 56 mio. kr.-nik sipaaruteqarnermik kinguneqassaaq. Kisiannili tamakku kingunissaannik misissueqqaarani qulaajaaqqaaranilu ataatsimut isigalugu sipaaruteqartoqarsinnaanngilaq. Assersuutigalugu Namminersorlutik Oqartussat kontuni pingaarnerni isumaqatigiissutit tunngavigalugit pisussaaffeqarput. Sipaarutilli tamarmiusut, kontut taakku sipaaruteqarfiginngikkaanni, 56 mio.kr.-nit taaneqartunit annikinnerussapput.

13. Siunnersortinut aningaasartuutit appartinnissaannut Naalakkersuisut sunik iliuuseqassallutik eqqarsaateqarpat?

Akissut:

Naalakkersuisut ukiumut aggersunut aningaasanut inatsisissatut siunnersuutip saqqummiunneranut atatillugu aningaasanut politikkeritk periuseq nalinginnaasoq naapertorlugu saqqummiuttarpaat. Taamaammat siunnersortinut aningaasartuutit appartinneqarnissaannik Naalakkersuisut aalajangersimasumik pilersaaruteqarnerisut § 37 naapertorlugu apeqqutinut sinaakkutit iluanni akineqarsinnaanngilaq. Ilisimatitsissutigineqarsinnaavorli siunnersortinut avataaneersunut aningaasartuutit appartinnissaat pillugu apeqqut 2022-mut aningaasanut inatsisissatut siunnersuutissap piareersarnerani ilanngunneqarsinnaanera aamma eqqarsaatigineqarsinnaasoq.

14. Naalakkersuisut qinersivimmi uani akileraarutinik aaqqissuusseqqissallutik nalunaaruteqarput. Politikkikkut isumaqatiginninniarnert qaqugu aallartissallugit eqqarsaatigineqarpa?

Akissut:

Eqqorpoq aningaasaqarnermi akileraarternimilu imminut atasumik aaqqissuusseqqinnissamik aamma qitiusumik allaffissuarmi aaqqissuusseqqinnissap aallartinneqarnissaanik Naalakkersuisut naalakkersuisoqatigiit isumaqatigiissutaat naapertorlugu anguniagaqartut.

Anguniagaq pisariusoq annertoorlu pineqarpoq, piujiartitsineq
ataqatigiinnerlu ilanngunneqassappata annertuumik
piareersaanissamik pisariaqartitsiviusoq.

Aaqqissuusseqqinnissap pineqartup imarisaa
piviusunngortinneqarnissanullu piffissaritinneqartussa
Naalakkersuisut maannakkut aamma § 37 naapertorlugu
apeqqutinut sinaakkutit iluanni sukumiinerusumik
oqaaseqarfigisinnaangilaat. Erseqqissarneqassarli inuiaqatigiinni
immikkoortut pingaaruteqartut pillugit siamasissumik
isumaqatigiissuteqarnissaq Naalakkersuisut kissaatigigaat,
taamaammallu ilaatigut akileraarutiniq aaqqissuusseqqinnissap
imarisassai pillugit isumaqatigiinniarnissanut aggersaanissaq
soorunami ilimagigaat.

Inussiarnersumik inuulluaqqusillunga


Aai Chemnitz Narup